

DOMENIE V «VIE PAL AN»

Antifone di jentrade Sal 94,6-7

Vignît, adorîn Diu,
butînsi a schene plete denant dal Signôr che nus à creâts;
al è lui il Signôr nestri Diu.

Colete

Ten cont di cheste tô famee, Signôr,
cuntun afiet che nol cognòs polse,
e, midiant che si poe dome inte sperance de gracie dal cîl,
vuardile simpri cu la tô protezion.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Is 58,7-10

La tô lûs e cricarà come l'albe.

Dal libri dal profete Isaie
Cussì al dîs il Signôr: «Creve il to pan a di chel che al à fan,
mene dentri in cjase i puars cence sotet,
cuvierç chel che tu âs viodût crot,
cence lassâ di bande chei de tô cjar.
Alore la tô lûs e cricarà come l'albe,
e la tô feride si sierarà in curt;
la tô justizie e marçarà denant di te,
e la glorie dal Signôr ti vignarà daûr.
Alore, se tu clamis, il Signôr ti rispuindarà;
se tu preis, lui al disarà: Ve chi che o soi.
Se tu tirarâs vie di te il jôf,
il pontâ il dêt e il fevelâ cun tristerie,
se tu i darâs il to pan a di chel che al à fan,
se tu saciarâs l'anime tibiade,
alore la tô lûs e cricarà framieç dal scûr,
il to scûr al sarà tant che il misdî».
Peraule di Diu.

SALM RESPONSORIÂL dal Salm 111

R. Il just al splent come la lûs.

Furtunât l'om che al à timôr dal Signôr:
come une lûs si impie tal scûr pe int oneste.
Furtunât l'om che al à dûl e al impreste,
che al fâs i siei dafâs cun justizie. **R.**

Il just nol cloparà par mai,
al sarà ricuardât par simpri.
Nol varà pôre di nissune brute gnove:
al è salt il so cûr parcè che dal Signôr si fide. **R.**

Il so cûr si sint sigûr: nol varà pôre di sorte.
Ur à dât ai puars cence misure;
la sô justizie e durarà par simpri;

la sô fuarce si alçarà in glorie. **R.**

SECONDE LETURE 1 Cor 2,1-5

Us ài predicjade la testimoniance di Jesù Crist metût in crôs.

De prime letare di san Pauli apuestul ai Corints

Jo, fradis, cuant che o soi rivât framieç di vualtris, no mi soi presentât a predicjâus la testimoniance di Diu cun grandece di peraule o di sapience. Mi jeri proponût di no savê fra di vualtris nuie altri che Jesù Crist, e propit lui metût in crôs. Jo mi soi presentât framieç di vualtris te debolece e cun grande pôre e trepidazion: e la mê peraule e lis mê prediejis no si son poiadis su peraulis sapientis par convincius ma su la conferme dal Spirt e la sô potence, par che la vuestre fede no si poi suntune sapience umane ma su la potence di Diu.

Peraule di Diu.

CJANT AL VANZELI cf. Zn 8,12

R. Aleluia, aleluia.

Jo o soi la lûs dal mont, al dîs il Signôr,
chel che al ven daûr di me al varà la lûs de vite.

R. Aleluia.

VANZELI Mt 5,13-16

Vualtris o sês la lûs dal mont.

Dal vanzeli seont Matieu

In chê volte, Jesù al disè ai siei dissepui: «Vualtris o sês il sâl de tiere; ma se il sâl al devente lami cun ce si varaial di salâ? Nol sarà plui bon par nuie, dome di jessi butât vie e tibiât de int.

Vualtris o sês la lûs dal mont. Une citât metude suntune mont no pues restâ platade. E nancje no si impie un lampion par metilu sot dal miezut; si lu poe invezit sul cjandelîr par che ur fasi lûs a ducj chei che a son in cjase. Cussì e à di lusî la vuestre lûs denant dai oms par che, viodint lis vuestris oparis buinis, a glorifichin il Pari vuestri che al è tai cî».

Peraule dal Signôr.

Su lis ufiertis

Signôr nestri Diu,

che tu âs creât il pan e il vin

soredut par sostentâ la nestre debolece,

fâs, par plasê,

che a diventin par nô ancje il sacrament de eternitât.

Par Crist nestri Signôr.

Antifone a la comunion cf. Sal 106,8-9

Che i disin graciis al Signôr pal so boncûr,
pes robonis che ur à fat ai umign;
parcè che l'anime plene di sêt al à saciade
e l'anime plene di fan al à colmade di robe.

O ben: Mt 5,4.6

Furtunâts chei che a vain, parcè che a saran consolâts.

Furtunâts chei che a àn fan e sêt de justizie, parcè che a saran saciâts.

Daspò de comunion

Diu, tu âs volût che o partecipassin
di un unic pan e di un unic cjaliç;

danus, par plasê, di diventâ une robe sole in Crist,
par vivi in serenitât e zovâi a la salvece dal mont.
Par Crist nestri Signôr.